

Date – 14/12/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoman kum 2036 ah India in Olympic a thlen turah ram aiawh thei tura Mizo te chher chu an tum ber a ni tih a sawi.
2. Home minister K. Sapdanga chuan Krismas leh Kumthar lawm tura theihtawpa in buatsaih mek Mizo mipui te chu halpuah hal lo turin a ngen leh.
3. Supply Minister Pu B. Lalchhanzova'n krismas leh kumthar vuakvet atan Mizoramah buhfai dahkhawl a tam tawk tih a sawi.
4. Vawiin Lok Sabha inkhawmah India ram Danpuiin kum 75 chhunga kawng a zawh chhoh dan chanchin sawiho chhunzawm a ni.

<><><>

CM

Chief Minister Pu Lalduhoman kum 2036 ah India in Olympic a thlen turah ram aiawh thei tura Mizo te chher chu an tum ber a ni tih a sawi.

Thenzawl, Lothazawl playground-a Pu B. Lalchhanzova, Minister nu leh pa Pu B. Lalthuamliaana leh Pi Rohnuni te hriatrengna Football Tournament kharna vawiina a hmanpuinaah he thu hi sawiin, Chief Minister chuan Olympic ah Mizo thalaite India aiawha an tel ve ngei theih nan Vision 2036 an kalpui a ti a, Olympics Discipline, an lo inpuahchah ve theihna kawngah an inpuahchah nasa dawn a, kan naupang, talent nei te zawn chhuah a, training pek a, India aiawh thei tura chher chu an tum ber a ni a ti.

Chief Minister chuan, Thenzawlah MLA fund leh fund dangte hmangin Indoor Volleyball Stadium din an tum mek a ti a, Community Hall pawh an theih angin an ngaihtuah zui ang a, Football house an dil te pawh a kawng an zawng dawn a ni, a ti.

<><><>

HOME MINISTER

Home minister K. Sapdanga chuan Krismas leh Kumthar lawm tura theihtawpa in buatsaih mek Mizo mipui te chu halpuah hal lo turin a ngen nawn.

Akashvani Aizawl News zawhna chhangin Pu K. Sapdanga chuan kum dangah chuan halpuah hal khapna thupek chhuah tlai deuh thin a nih vang te, mipui tanrual tawk loh vangte in khapna thupekin zawm a hlawn lo deuh thin niin a lang a, kuminah chuan September ni 9-ah khap thu rel a ni a, chumi hnuah chuan uar taka puanzar a nih avangin a hlawnhtlin pawh a beisei awm, a ti.

Home Minister chuan, halpuah hal khapna dan bawhchhiate chu BNS Section 223 hmangin kum khat thleng lung-in tan leh Rs 5,000 thleng chawitir

theih a ni, a ti a; tun tuma khapna thupek hian halpuah, halmawi, meithallawn (sky lantern), silai lem mu nei chite a huam a ni, a ti.

Pu K. Sapdanga chuan kum tin halpuah leh halmawi hal avangin hri a leng ni a sawiin, hal nasat kum apiangin thi pawh an tam thin tih chhinchhiah a ni, a ti a. Halpuah leh halmawi avanga thi an awm lohna tur te, damlote tan phurrit siam a nih lohna tur leh, boruak chhia siam belh a nih lohna turin tanrualpuiah mi tin a sawm a ni.

Sorkarin halpuah hal a khap hi Central YMA pawhin a thlawp a. CYMA General Secretary Prof Malsawmliana chuan, branch tin hnenah hma la tura ngenna an sem tih a sawi a, halpuah hal that lohzia thuziak chi hrang hrang pek chhuah niin, mahni branch information center atanga tlangau turin an ngen bakah chhungtin hnenah lehkha sem turin an ngen a, branch thenkhat chuan kawng dungah te thu ziak tarin hma an la baw, tiin kan Corr a hrilh.

<><><>

KRISMAS

Mizo kristiante hunpui Krismas chu chawlhkar khat vel lekin a dang tawh a, Krismas chakkhai lam khawmin mipuite an inbuatsaih nasaa, District hrang hrangah te khawpui a lunin, bazar hmunpui te a tawt viau tawh a ni.

Lungleiah chuan Krismas inbuatsaihna kalzelah Super Market chu sak that mek anih avangin market kawtzawl ah leh Agriculture building ah a theih angin sumdawng ten thawmhnaw leh chawhmeh an zuar a, bazarna hmunpui a chep avangin chetvel a harsa in a remlo hle ni a thudawn a ni.

Lunglei leh a chhehvel atangin chawhmeh zuar leh chakkhai zawng an thleng tam tan hle tih kan corr chuan a sawi a, sumdawng te sawi danin Ni za inhlawhna a bo avangin inhralh har an tih thu an sawi baw a ni.

Khawzawl ah chuan mipuite Krismas boruakin chiah mahse sumdawwna dawr leh barzar lam a la reh ang reng hle a, krismas chakkhai lam mipui hmuh tur an la tam lo hle a ni.

Hetih lai hian veng thenkhatte chuan an veng khawlai dung an chei chho mek zel a, kawm leh khawlai chei pawh kum dang aiin an uar lutuk dawn lo niin a lang a, sokar department lam pawh pahnih khat tih loh chu a nawlpuiin mahni office chei an awm meuh lo a ni.

Krismas lo thleng tur urlawkna Naupang Carol Service chu Presbyterian kohhran buatsaihin nizan khan Mizoram hmun hrang hrangah hman a ni.

Mizorama kohhran lian Presbyterian chuan ram pumah a ruala hman tura a rel angin Zirtawpni zan khan hman a ni a, Sunday School naupang ten anmahni kohhran theuhah hmangin zai leh lamin Pathian an fak a, Lal Isua pian dan lantirna lemchan entir an awm baw.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Natuk zing dar 7 leh a chanve ah Chanchinthar hi puan leh a ni ang.

<><><>

SUPPLY

Food, Civil Supplies & Consumer Affairs Minister Pu B. Lalchhanzova'n krismas leh kumthar vuakvet atan Mizoramah buhfai dahkhawl a tam tawk tih a sawi.

Vawiina Akhashvani Aizawl News zawhna a chhan danin Pu B Lalchhanzova chuan, buhfai chhekkhawl chungchangah harsatna lian tham thleng a awm lo a ti a, tun hnai khan Bairabi-ah Transformer kang a awm avangin harsatna tenau deuh chu thleng ve mah se buaina lian a awm lo niin a sawi.

Supply Minister Lalchhanzova chuan Food Corporation of India (FCI) atangin buhfai lakluh zel a ni a ti a, hei bakah hian mipui mamawhna avangin hmun dang atanga lakluh a ni a ti bawk a, hun pui lo thleng tur atan bufaia buaina awm lo turin Mizoram sorkar a inbuatsaih tih a sawi bawk a ni.

<><><>

LOK SABHA TODAY

Vawiin Lok Sabha inkhawmah India ram Danpuiin kum 75 chhunga kawng a zawh chhoh dan chanchin sawiho chhunzawm a, Parliamentary Affairs Minister Kiren Rijiju-a'n Danpui duannaa Dr. Bhim Rao Ambedkar hmalakna chu a fakawm takzet a ni, a ti.

Zalenna neih anih hnuah mitinin dikna chanvo inang vek neih tir an ni tih sawiin India ramah hnam tlem zawkte enhranna a awm lo, a ti a, hnam tlem zawk 6-te chawikanna tur scheme chi hrang hrang kalpui a ni, a ti. Kum 2014-a NDA-in thuneihna an chan hnua hmarchhak bial hmasawn chhoh dan pawh tarlangin Pu Rijiju-a chuan kum 1947 leh 2014 inkarah hmar chhak-ah thlawhna tum hmun 9 din a ni a, kum 10 kalta chung khan 17 a tling chho thei a ni, a ti.

<><><>